

Kalata gwa kwanda ugwa Johani Isyakulongosya

Ƴntamigwa Johani aasimbile kalata ujũ kũ biitiki bamo aba aabaganile bo ulwa baanaake. Ikubapyelesya abiitiki ukwendelela ukwima kanunu ndwitiko kwa Kyala mwa Jesu Kilisiti, kangi ikubasoka ukusikaana imanyisyo sya bamanyisi baa butungulu, aba baalimo nkipanga kya Kyala. Ikubakumbusya abiitiki ukuti umwene aali na Jesu, po ulo ameenye nalooli ukuti Jesu aali nũ mbili ugwa mundũ bo ulwitũ, kangi aali Mwana gwa Kyala. Ikubasisimikisya abiitiki ukuti, aabikujaga nũ bũmi bwa bwila na bwila, linga bikwendelela ukummwitika Jesu. Ikubabũula ukuti abiitiki bikulondigwa bwila bannganega Kyala nũ kũganana abeene.

Isi silimo mwa kalata ujũ
Jesu lyo isyũ ilya bũmi
Abiitiki bajege ndumuli, bajege bandũ baa Kyala abaa kusũ
Abiitiki baana baa Kyala, bagananega
Abiitiki bajege maaso na bamanyisi baa butungulu, bendele
Ƴkubutola ubutulanongwa nũ kaja nũ bũmi bwa bwila na

Jesu lyo isyũ ilya bũmi

¹ Tukubalumbilila inongwa isya ujũ jo isyũ ili lili nũ bũmi, ujũ aaliko ukufuma kubwandilo

bwa kiisu.* Ƴswe twalimpiliike nũ kũmbona na maaso giitu, twankeetaga nũ kũmpalamaasya na maboko giitu. ² Ƴjo jo bwandilo bwa buumi aaboniike, uswe twalimmbwene. Liilino tukubasisimikisya nũ kubabuula inongwa isya ujo, uju ikutupapo ubuumi bwa bwila na bwila. Ƴjo aali kwa Taata Kyala, aaboniike kumyitu.† ³ Tukubalumbilila inongwa isya ujo Jesu Kilisiti, uju twalimmbwene nũ kũmpilika, ukuti nuumwe muje pamopeene na nuuswe mbuliilansi ubu tuli nabo mwa Taata Kyala, nũ Mwanaake‡ ujo. ⁴ Tukubasimbila isi, ukuti tusekele fiijo.

Ƴkwenda ndũmuli lwa Kyala

⁵ Kangi iisya ili twalipiliike kwa Jesu, ili tukubalumbilila umwe lyo ili. Kyala jo lumuli, apa alipo jikajapo ingiisi najimo. ⁶ Linga gwesa jumo pakati pamyitu ikuti, “Ndi nũ buliilansi na Kyala,” kũno ikwendelela ukutuugala mu ngiisi, atikutuugala mbwanalooli, looli ikujoba isya butungulu. ⁷ Looli linga tukutuugala ndũmuli bo ulwa Kyala, po tukujaga baliilansi, twe baabo batupu. Kangi iilopa lya Mwanaake Jesu Kilisiti likutwelusya ubutulanongwa bwitu boosa.

⁸ Linga tukuti uswe tukaja nũ butulanongwa, tukwisyoba twibeene, kangi ubwanalooli bukajamo mmyitu. ⁹ Looli linga tukwilaata imbiibi syitu, Kyala ikutuhobokela nũ kutwelusya ububiibi bwitu boosa, paapo umwene ngolofu kangi nsuubiligwa. ¹⁰ Linga

* **1:1** 1:1 Bala kalata gwa Ƴbwandilo 1:1; Johani 1:1-3. † **1:2** 1:2 Bala kalata gwa Johani 1:14. ‡ **1:3** 1:3 ƳMwanaake Bala iisya ƳMwana gwa Kyala kũ Isyakalingania.

tukuti tukatula inongwa, tukummbiika Kyala ukujja ntungulu, kang'i iisyu lyake likajamo mmyitu.

2

Jesu ikusumila abandũ kwa Taata Kyala

¹ Baanangu ndwitiko, ngubasimbila inongwa isi, ukuti mulingabombaga ubutulanongwa. Looli nalinga umundu abombile ubutulanongwa, tũli nagwe ugwa kutusumila kwa Taata Kyala, ujo jo Jesu Kilisiti, uNgolofu. ² Jesu lyo ikemo lya kũbooligwa. Ku njila jaa ikemo ilyo, aabusooisiyemo ubutulanongwa bwitu, kang'i aatufwenie na Kyala. Kang'i bomma ubutulanongwa bwitu bwene, looli nu butulanongwa ubwa bandũ boosa.

Ulungilo lwa Jesu ulwa kũganana

³ Linga tukusikonga indagilo sya Kyala, sikunangisya ukuti tummeenye Kyala. ⁴ Umundu ujũ ikuti, "Nũmeenye Kyala," looli atikusikonga indagilo syake, ntungulu, ubwanalooli bukajamo mmyake. ⁵ Looli gwesa ujũ ikulikonga iisyu lya Kyala, ujo annganile Kyala nalooli. Iji jo njila ijaa kũmanya ukuti tũli mwa Kyala. ⁶ Umundu ujũ ikuti, "Ndi mwa Kyala," ikulondigwa ajege na kajiilo bo aka aali nako Jesu.

⁷ Bakundwe, ulungilo ulu ngubasimbila lukaja lupya, looli lo lulalala ulwa ijolo ulu mwali nalo

ukufuma mbwandilo bwa kummwitika Jesu.*
 Ululagilo ulu ulwa ijolo lyo isyu ili mwapiliike.
 8 Looli poope ululagilo ulu ngubasimbila luya.
 Ubwanalooli bwa isi ngusijoba, isya lulagilo
 ulu, bukuboneka mwa Jesu Kilisiti na mmyinu,
 bukunangisya ukuti ingiisi jikusooka, ulumuli
 lwa nalooli lukwanda ukutumulikila.

9 Gwesa uju ikuti, “Ndi ndumuli,” kuno
 ammbengile umwitiki nnine, akaali ali mu
 ngiisi. 10 Gwesa uju annganile umwitiki
 nnine, ujo ikwendelela ukuja ndumuli. Kaka-
 jamo nakamo nkati mmyake akaa kunngwikisya
 mbutulanongwa. 11 Looli gwesa uju ammbengile
 umwitiki nnine jo ali mu ngiisi, ikwenda mu
 ngiisi, jo akamanya na kuno ikulabila, paapo
 ingiisi jinkupikiile kumaaso.

12 Nikubasimbila umwe mwe baanangu nd-
 witiko,
 paapo ubutulanongwa bwinu muhobokeli-
 igwe,
 ku njila jaa ngamu jaa Jesu Kilisiti.

13 Nikubasimbila umwe baataata,
 paapo mummeenye Jesu Kilisiti,
 uju aaliko ukufuma kubwandilo bwa kiisu.
 Nikubasimbila umwe mwe balumyana na mwe
 balindwana,
 paapo muntolile Seetano.

Nikubasimbila umwe mwe baanangu ndwitiko,
 paapo mummeenye Taata Kyala.

14 Nikubasimbila umwe baataata,
 paapo mummeenye Jesu Kilisiti,
 uju aaliko ukufuma kubwandilo.

* 2:7 2:7 Bala kalata gwa Johani 13:34.

Nikubasimbila umwe mwe balumyana na mwe balindwana,
 paapo muli na maka,
 iisyu lya Kyala lilimo mmyinu,
 kangi muntolile Seetano.

Ukujja maaso na balugu baa Kilisiti

¹⁵ Po leelo mulingatuganaga utundu utwa nkiisu muno utu batuganile aba bakammanya Kyala. Linga umundu atuganile utundu uo, akaja nu lugano kwa Kyala mu ndumbula jaake.

¹⁶ Ububiibi ubwa nkiisu bo ubu. Ukunyonywa ifya mbili, ifinyonyo ifya maaso nu kwijumbika kunongwa jaa kaja ni kyama. Fyosa ifyo fitikufuma kwa Taata Kyala, looli fikufuma nkiisu.

¹⁷ Ikiisu pamopeene ni finyonyo fyake ifibiibi fikukinda. Looli uju ikubomba ubwigane bwa Kyala, ikukaba ubuumi bwa bwila na bwila.

¹⁸ Baanangu, amasiku gaa kummaliikisyo gafikile! Mupiliike ukuti undugu gwa Kilisiti[†] ikwisa, na ulu abalugu bingi biisile. Po apa tusimanyiile ukuti tuli mmasiku gaa kummaliikisyo.

¹⁹ Abalugu abo baafumile kumyitu, looli ku bwanalooli bakaali pamopeene na nuuswe, paapo linga baali pamopeene na nuuswe ku bwanalooli, ngali basyele kumyitu. Looli baasookileko ukuti siboneke pabwelu ukuti boosa bakaali pamopeene na nuuswe.

²⁰ Pamopeene na isyo, umwe Jesu abapeele Mbepo gwake,[‡] ulu mwesa mubameenye

[†] **2:18** 2:18 Undugu gwa Kilisiti Kokuti uju ikumpinga Kilisiti.

[‡] **2:20** 2:20 Abapeele Mbepo gwake Ubagiile ukuti Abapakile amafuta.

ubwanalooli. ²¹ Nikubasimbila kalata ujũ, kukaja kokuti mukabumanya ubwanalooli, looli paapo mubumeenye. Kangi paapo umwe mumeenye ukuti ubutungulu boosa butikufuma mbwanalooli. ²² Umundu untungulu jo jwani? Jo jula ikukaana ukuti Jesu jo Meesija. § Umundu bo ujo jo ndugu gwa Kilisiti, ikunkaana Taata Kyala nu Mwanaake. ²³ Linga umundu ikunkaana uMwana, akaja pamopeene na Taata Kyala. Looli linga umundu ikummwitika uMwana, ali pamopeene na Taata Kyala.

²⁴ Looli umwe, amasyu aga mwalyambiliile ukufuma kubwandilo bwa kummwitika Jesu, gendelelege ukaja mmyinu. Linga amasyu ago gikwendelela ukaja mmyinu, po na nuumwe mukwendelelaga ukaja mMwana, na mwa Taata Kyala. ²⁵ Isyo syo isi aafingile uMwana kumyitu, ko kaja nu buumi bwa bwila na bwila.

²⁶ Nikubasimbila inongwa isi isya bandu aba bikulonda ukubasobesya umwe. ²⁷ Looli umwe, mwambiliile Mbepo Mwikemo, ujũ ali nkati mmyinu. Ujo jo ujũ ikubamanyisya syosa, imanyisyo syake sya bwanalooli, sikaja sya butungulu. Kunongwa ijo sitikulondigwa ukuti umundu abamanyisye.* Bo muno Mbepo abamanyisye, mwendelelege ukaja mwa Kilisiti.

Abiitiki baana baa Kyala

²⁸ Liilino baanangu, mwendelelege ukaja pamopeene na Kilisiti, ukuti akabalilo akaa kwisa kangi, twise tajege bakifu. Tunguuisa

§ 2:22 2:22 Meesija Bala ku isyakulingaania. * 2:27 2:27 Bala kalata gwa Johani 14:26.

kwibiilila kunongwa jaa kaja ni soni pi isiku lyake ilya kwisa kwake.

²⁹ Mumeenye ukuti Kilisiti ngolofu. Kunongwa ijo mumanye ukuti kukuti mundu ujũ ikubomba isya bugolofu, ujo jo mwana gwa Kyala.

3

¹ Namukeete muno Taata atuganiile fiijo, mpaka tukujobigwa ukaja baanaake! Nalooli bo tuli. Abandu aba batikuntiila Kyala bakatumanya, paapo bakammanya umwene.

² Bakundwe, liilino uswe tuli baana baa Kyala, looli sikamanyigwa muno aatukujilaga. Looli tumeenye ukuti akabalilo kaa Kilisiti ukwisa kangi, tukwisa kaja bo umwene, paapo tukwisa kummbona muno ajilile. ³ Kangi gwesa ujũ ikusubila bo ulo, ukuti ikwisa kaja bo umwene itolo, iijeelusyege ukuti aje mwikemo, bo ulu Kilisiti jujuo mwikemo.

⁴ Gwesa ujũ ikubomba ubutulanongwa, ikubomba bo ulwa jula umwila ndagilo, namanga ukubomba ubutulanongwa ko kwila indagilo. ⁵ Looli mumeenye ukuti Kilisiti aaliisile kukubusoosyamo ubutulanongwa bwitu. Kangi umwene atikubomba ubutulanongwa nabumo. ⁶ Gwesa ujũ ikwendelela ukaja mwa Kilisiti, atikwendelela ukwila indagilo syake. Joope ujũ ikwendelela ukwila indagilo syake, akammbonamo Kilisiti, kangi akammanya ukuti jo jwani.

⁷ Baanangu, mulingiitikaga ukuti umundu gwesa jula abasobesye. Umundu ungolofu nkyeni mwa Kyala, ujo jo ujũ ikubomba isya

bugolofu, bo ulu Kilisiti ngolofu. ⁸ Looli umundu uju ikubomba ubutulanongwa gwa Seetano, paapo Seetano ikwendelela ukubomba ubutulanongwa ukufuma kubwandilo bwa kiisu. Jo nongwa iji, uMwana gwa Kyala* aaliisile pakiisu, ukusyonanga imbombo sya Seetano.

⁹ Gwesa uju mwana gwa Kyala atikwendelela ukubomba ubutulanongwa, paapo nkati mmyake Kyala aabikile ubuumi bwake jujo. Akabagila ukwendelela ukubomba ubutulanongwa paapo umwene mwana gwa Kyala. ¹⁰ Looli umundu uju atikubomba inunu, pamo akanngana umwitiki nnine, ujo akaja mwana gwa Kyala. Mo muno tukukumanyila ukulegana ukwa baana baa Kyala na baa Seetano.

Ukuganana

¹¹ Indumi iji mwajipiliike ukufuma kubwandilo bwa kummwitika Jesu, jo iji jikuti tugananega. ¹² Tulingajaga bo Kaini. Aali gwa Seetano! Aalinngogile unnuguna!† Fiki aalinngogile? Paapo syosa isi aabombile unnuguna syali nunu. Umwene aabombile imbiibi.

¹³ Po mwe baamyitu ndwitiko, mulingaswigaga ukubengigwa na bandu aba batikantiila Kyala. ¹⁴ Uswa tubaganile abiiniitu, fyobeene tumeenye ukuti tusookilemo mmaka gaa bufwe, twingiile mbuumi bwa bwila na bwila. Umundu uju

* **3:8** 3:8 uMwana gwa Kyala Bala ku Isyakulingaania. † **3:12** 3:12 Bala kalata gwa Ubwandilo 4:1-8.

akaja nu lugano, asyele mmaka agaa bufwe.‡
 15 Gwesa uju ikumbenga umwitiki nnine, ngogi. Mumeenye ukuti akajako unngogi uju ali nabo ubuumi bwa bwila na bwila nkati mmyake.

16 Uwe tumeenye ulugano muno lujiliile, paapo Kilisiti aabuningile ubuumi bwake kunongwa jitu. Na nuuswe bo lulalula tukulongigwa tubuningege ubuumi bwitu kunongwa jaa biitiki biinitu. 17 Po gwesa unakabi gwa kyuma kya nkiisu, linga ikumbona umwitiki nnine agiilwe fimo, looli akaja ni ndumbula ijaa kibabilisi, ikujobaga buleebule ukuti ali nalo ulugano lwa Kyala? 18 Baanangu, talingajobaga peene pa kanwa ukuti tubaganile abiinitu, looli tubaganege nalooli ku njila jaa kubabombela inunu. 19 Ukubagana abiinitu bo ulu, tubagiile ukumanya kisita kwilaamwa, ukuti tukubakonga ubwanalooli. Kangi indumbula syitu sikutengaana nkyeni mwa Kyala, 20 nalinga tukulongigwa mu ndumbula, paapo tumeenye ukuti Kyala jo nkulumba ukusikinda indumbula syitu. Kangi umwene asimeenye syosa.

21 Bakundwe, linga tutikulongigwa mu ndumbula syitu, po tubagiile ukuja nu bukifu ubwa kusegelela nkyeni mwa Kyala. 22 Kangi tukwambilila ukufuma kumyake koosa aka tukunsuuma, paapo tukusitiila indagilo syake nu kubomba isi sinkyeliile. 23 Ululagilo lwake lo ulu, ukuti tujitike ingamu jaa Mwanaake Jesu Kilisiti, nu kuganana, bo muno aatulagiliile. 24 Kangi gwesa uju ikusitiila indagilo sya Kyala,

‡ 3:14 3:14 Bala kalata gwa Johani 5:24.

ikwendelela ukuya mwa Kyala, joope Kyala ikwendelela ukuya mmundu ujo. Tameenye ukuti Kyala ali nkati mmyitu. Buleebule? Paapo aatupeele Mbepo Mwikemo gwake.

4

Injila jaa kubamanya abamanyisi baa bwanalooli na baa butungulu

¹ Bakundwe, paapo abakunguluka bingi abaa butungulu baboniike pakiisu, mulingabiitikaga abandũ boosa aba bikuti bali na Mbepo gwa Kyala, looli mubakeetege kanunu ukuti abandũ abo bikulongosigwa na Mbepo gwa Kyala pamo mma. ² Injila jaa kumanya ukuti umundu ikulongosigwa na Mbepo gwa Kyala jo iji. Gwesa uju ikwitika nu kujoba ukuti Jesu Kilisiti aalisile alinkuja nu mbili bo ugwa mundu, ujo jo uju ikulongosigwa na Mbepo gwa Kyala. ³ Looli gwesa uju atikummitika Jesu bo ulo, atikulongosigwa na Mbepo gwa Kyala. Umundu ujo ikulongosigwa ni mbepo jaa ndugu gwa Kilisiti. Umwe mupiliike ukuti imbepo ijo jikwisa, na ulu jiiisile pakiisu.

⁴ Looli baanangu, umwe muli bandu baa Kyala, mubatulile abandũ abo abaa butungulu, paapo Mbepo gwake uju alimo nkati mmyinu, umwene ali na maka ukunkinda Seetano, uju ikubalongsya abandũ abaa pakiisu. ⁵ Abakunguluka abo abaa butungulu baa pakiisu, bikujoba isya pakiisu. Boope abandũ abaa nkiisu bikubapilikisya. ⁶ Looli uswe tuli bandu baa Kyala. Umundu uju ammeenye Kyala,

ikutupilikisya, looli umundu uju akaja gwa Kyala, atikutupilikisya.

Ku njila ijo tukukumanya ukulegana ukwa bandu aba bikulongosigwa na Mbepo gwa bwanalooli, na kuli bala bikulongosigwa ni mbepo ijaa butungulu.

Kyala abaganile abaanaake, po boope bagananege

⁷ Bakundwe, tugananege, paapo ulugano lukufuma kwa Kyala. Umundu gwesa uju abaganile abanine, jo mwana gwa Kyala, kangi jo ammeenye Kyala. ⁸ Looli umundu uju akabagana abanine, akammanya Kyala, paapo ulugano lukufuma kwa Kyala.

⁹ Kyala jujo aatunangiisye ulugano lwake ku njila jaa kuntuma uMwanaake jumojwene ntiga nkiisu muno, ukuti mo tubwagile ubuimi. ¹⁰ Ulugano ulwa nalooli kukaja kokuti tunnganile Kyala! Looli umwene jo uju aatuganile uswe, mpaka aalintumile nu Mwanaake, aje ikemo lya kubooligwa ukuti abusoosyemo ubutulanongwa bwitu nu kutufwania na Kyala. ¹¹ Bakundwe, linga Kyala aatuganile uswe bo ulu, tukulondigwa na nuuswe tugananege. ¹² Akajako umundu najumo uju ammbwenemo Kyala. Looli linga tukuganana, Kyala ikwendelela ukuja nkati mmyitu, nu lugano lwake lukwisula nkati mmyitu.

¹³ Tumeenye ukuti tukwendelela ukuja mwa Kyala, joope Kyala ikwendelela ukuja nkati mmyitu, paapo atupeele Mbepo gwake. ¹⁴ Uswe

tusibwene, kangi tukubanangisya abangi, ukuti Taata Kyala aalintamile umwanaake pakiisu, ukuti aje Mpoki gwa bandu. ¹⁵ Umundu gwesa ujū ikwitika ukuti Jesu Mwana gwa Kyala, Kyala ikūja nkati mmyake, joope ikūja nkati mwa Kyala. ¹⁶ Liilino uswe tumeenye nū kwitika ukuti Kyala atuganile.

Ulugano lukufuma kwa Kyala. Gwesa ujū ikūja ndugano lwake, ikūja moope mwa Kyala jūjo, na kangi Kyala ikwendelelaga ukūja nkati mmyake. ¹⁷ Jo nongwa iji, ulugano lwake Kyala lukwisula nkati mmyitu, ukuti tujege bakifu pi isiku lya kulongigwa, paapo ubūmi bwitu nkiisu muno, bufwene bo muno Jesu aatugaliile pakiisu. ¹⁸ Apa pali nū lugano pakaja nū lutende, looli ulugano ulwa nalooli lukulusoosya ulutende loosa, paapo ukulongigwa ko kuno kukubapelela abandū ukūja nū lutende. Gwesa ujū ali nū lutende, ulugano lwa Kyala lukiisula nkati mmyake.

¹⁹ Uswe tukuganana, paapo Kyala aatalile ukutugana. ²⁰ Linga jūmo ikuti, “Nunnganile Kyala,” kuno ammbengile umwitiki nnine, ntungulu. Po gwesa ujū akanngana unnine, ujū ikummbona na maaso, abagiile buleebule ukunngana Kyala ujū atikummbona? ²¹ Kyala atupeele ululagilo ukuti gwesa ujū annganile Kyala, ikulondigwa ukuti annganege joope umwitiki nnine.*

5

* **4:21** 4:21 Bala kalata gwa Maalika 12:30-31.

Ʋkubutola ubutulonongwa bwa pakiisu

¹ Gwesa ujũ ikwitika ukuti Jesu jo Meesija, ujjo jo Mwana gwa Kyala. Gwesa ujũ annganile umpaapi, annganile nu mwana gwa mpaapi ujjo. ² Muno mo muno tukumanyilamo ukuti tubaganile abaana baa Kyala. Ku njila jaa kunngana Kyala, nu kusitiila indagilo syake. ³ Po ukunngana Kyala ko kusitiila indagilo syake, kangi indagilo syake sikaja sito, ⁴ paapo gwesa ujũ jo mwana gwa Kyala, ikusitola isya pakiisu. Ulo mo muno tusitoliile isya pakiisu, ku lwitiko lwitu. ⁵ Bule, jo jwani ujũ abagiile ukusitola isya pakiisu? Mwene ujũ ikwitika ukuti Jesu Mwana gwa Kyala.

⁶ Umwana ujjo jo Jesu Kilisiti, ujũ aabonike apa, ukufuma akabalilo aka aalyosiigwe na miisi mpaka akabalilo aka iilopa lyake lyalyonike. Looli akaalyosiigwe itolo, aalyonile iilopa lyake lyope. Joope Mbepo Mwikemo nkeeti, ikusisimikisya ukuti isyo sya nalooli, paapo Mbepo Mwikemo jo bwanalooli. ⁷ Fyobeene bali batatu aba bikusisimikisya inongwa sya Jesu. ⁸ Mbepo Mwikemo, amiisi gaa koosigwa, ni ilopa ilya kufwa kwake. Abo bali nu bukeeti ubu bukwickana. ⁹ Linga tukubwitika ubukeeti bwa bandu, ubukeeti bwa Kyala bukulumba ukukindapo, paapo jo Kyala juujo ujũ ikusisimikisya isya Mwanaake.

¹⁰ Umundu gwesa ujũ ikummwitika umwana gwa Kyala, ikubukola kanunu ubukeeti ubo ubwa Mwana nkati mmyake. Looli ujũ atikumwitika Kyala, ammbiikile Kyala ukuti

ntungulu, paapo akabwitika ubukeeti ubu Kyala ikusisimikisya isya Mwanaake. ¹¹ Ubukeeti bo ubu, Kyala atapeele ubuumi bwa bwila na bwila, ubuumi ubo tukubwagila ku Mwanaake. ¹² Umundu gwesa ujū ali pamopeene nu Mwana gwa Kyala, ali nabo ubuumi ubo. Looli ujū akaja pamopeene nu Mwana gwa Kyala, akaja nu buumi ubo.

Ukūja nu buumi bwa bwila na bwila

¹³ Mbasimbiile amasyu aga, mwe mujiitike ingamu jaa Mwana gwa Kyala, ukuti manye ukuti muli nabo ubuumi bwa bwila na bwila. ¹⁴ Tuli bakifu nkyeni mwa Kyala, paapo tumeenye ukuti ikutupilika, linga tukunsuuma fyosa fila ukufwana nu bwigane bwake. ¹⁵ Po tumeenye ukuti ikutupa ifi tukunsuuma fyosa fila, paapo ikutupilika bo tukunsuuma.

¹⁶ Buliko ubutulanongwa ubu butikummbiika umundu kubutali na Kyala bwila na bwila. Linga umundu ikummbona umwitiki nnine ikubomba ubutulanongwa bo ubo, ansuumilege kwa Kyala, po Kyala ikumpapo ubuumi. Sikūja bo ulo kulī aba bikubomba ubutulanongwa bo ubo. Looli buliko ubutulanongwa ubu buikummbiika umundu kubutali na Kyala bwila na bwila. Une ndikuti ansuumilege kwa Kyala kunongwa jaa butulanongwa ubo. ¹⁷ Ukubomba syosa sila isi sikabagisya nkyeni mwa Kyala, ko kubomba ubutulanongwa. Looli pamopeene na isyo, buliko ubutulanongwa ubu butikummbiika umundu kubutali na Kyala bwila na bwila.

18 Tumeenye ukuti abaana baa Kyala batik-wendelela ukubomba ubutulanongwa. Umwana gwa Kyala, Jesu Kilisiti, ikubalindilila. Seetano akabagila ukubabombela simo. 19 Tumeenye ukuti uswe tuli baana baa Kyala, abangi boosa nkiisu bikulagiligwa na Seetano. 20 Kangi tumeenye ukuti umwana gwa Kyala aaliisile, atupeele amahala, ukuti tummanyeye ujũ jo Kyala gwa nalooli. Tuli mbwanalooli ubo paapo tuli mMwanaake Jesu Kilisiti. Ujo jo Kyala gwa nalooli, kangi jo buumi bwa bwila na bwila.

21 Baanangu, mujege maaso mulingiipuutaga ku tundu, paapo utundu akaja jo Kyala.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

14ff4521-53e4-562c-aacb-6f4faf55a6c8